



## Sumáriu Kazu

### Tribunál Judisiál Primeira Instánsia Díli

Marsu 2023

**Afirmasaun:** Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

## A. Sumáriu prosesu julgamentu kazu iha Tribunál Judisiál Primeira Instánsia Díli

### 1. Totál kazu ne'ebé JSMP monitoriza :8

Artigu	Tipu Kazu	Númeru
art.145 hosi kodigo penal, konjuga ho artigu 2, 3(a), 35(b) no 36 LKVD	Krime ofensa ba integridade fízika simples ho natureza violénsia doméstika	4
Artigu 258	Krime danu simples	1
Artigu 23 KP	Krime tentative omesidiu simples	1
Artigu 145 no artigu 20 no (1) Lei arma branka.	Krime ofensa intergrigadae fízika simples no arma branka	1
<b>Totál</b>		<b>7</b>

### 2. Totál desizaun ne'ebé JSMP monitoriza: 7

Tipu pena	Artigu	Númeru
Pena Multa	Artigu 67 KP	3
Pena Suspensaun	Artigu 68	2
Pena Prizaun	Artigu 66	2
<b>Totál</b>		<b>7</b>

### 3. Totál kazu sira ne'ebé adia tuir JSMP nia monitorizasaun:0

### 4. Totál kazu ne'ebé sei kontinua prosesu tuir JSMP nia monitorizasaun: 0

## B. Deskrisaun sumáriu julgamentu ba desizaun kazu sira

### 1. Krime ofensa integridade fízika simples ho natureza violénsia doméstika

Nú. Prosesu : 0004/21.LIBZT

Kompozisaun Tribunál : Singulár

Juis : Dr. Ivan Patrocino Antonino Gonçalves

Prokuradór : Dr. Luis Hernani Rangel da Cruz  
Defeza : Pessoa Idonia Ernesto  
Desizaun : Pena multa \$120.00

Iha 02 Marsu 2023, Tribunál Judisiál Primeira Instánsia Díli prezide julgamentu leitura sentensa ba krime ofensa integridade fízika simples ho natureza violénsia doméstika ne'ebé envolve arguidu Leandro Fatima Gonçalves hasoru lezada Verónica Soares hanesan arguidu nia feen, iha Munisípiu Likisá.

### **Akuzasaun Prokuradór**

Prokuradór akuza katak iha 05 Janeiru 2021 iha oras maizumenus oras tuku 7:00 dadeer iha uma Bazartete momentu ne'ebá arguidu tuku dala rua iha lezada nia tilun huun parte loos rezulta moras no kanek, arguidu kontinua uja kapasete baku tán dala ida iha lezada nia ulun kauza moras bubu no mean. Antes ne'e lezada haruka arguidu atu halo uma, maibé arguidu ho nerbozu halo kedas agresaun hasoru lezada, rezulta lezada sente moras iha tilun huun no ulun.

Prokuradór akuza arguidu kontra artigu 145 KP konjuga ho lei nú 7/2010 iha artigu 2,3 no 35 lei kontra violénsia doméstika.

### **Produsaun ba provas sira**

Iha prosesu julgamentu arguidu konfesa integralmente, promete perante tribunál lahalo tan krime hanesan iha ha futuru no husu ona deskulpa ba lezada.

Tribunál presinde lezada tanba arguidu konfesa integralmente ba faktu sira iha akuzasaun.

### **Alegasaun finál**

Prokuradór konsidera faktu sira provadu hotu bazeia ba arguidu nia konfiksaun no rekoñese ba nia hahalok nune'e husu ba tribunál fó pena multa ba arguidu tuir ninia rendimentu no fiksa mós pena alternativu seluk.

Enkuantu defeza haktuir katak arguidu konfesa integramente no sei la halo tan hahalok ne'e iha futuru ho nune'e husu ba tribunál atu fó pena ne'ebé mak justu no adekua ba arguidu.

### **Desizaun**

Tribunál konsidera faktu sira provadu, arguidu rasik konfesanune'e tribunál konklui prosesu ne'e no kondena arguidu ho pena multa \$120 kada loron sei selu US\$1.00 durante loron 120, arguidu sei kumpri iha prizaun durante loron 80 nu'udar pena alternativa.

## **2. Krime ofensa integridade fízika simples ho natureza violénsia doméstika**

Nú. Prosesu : 0327/22.DICMR  
Kompozisaun Tribunál : Singulár  
Juis : Dra. Albertina Neves

Prokuradór : Dr. Napoleão da Silva  
Defeza : Dr. Manuel Sarmiento  
Desizaun : Pena prizaun tinan 1

Iha 06 Marsu 2023 Tribunál Judisiál Primeira Instánsia Díli prezide julgamentu leitura sentensa ba krime ofensa integridade física simples ho natureza violénsia doméstika ne'ebé envolve arguidu Herculadu AdC hasoru nia feen, iha Munisípiu Díli.

### **Akuzasaun prokuradór**

Prokuradór akuza katak iha lora la apuradu Dezembru 2021 iha oras maizumenus iha oras tuku 18:00 lokraik arguidu dudu lezada monu tun ba rai no lori ain sama makaas dala ida iha lezada nia kotuk laran. Momentu ne'ebá lezada ho kondisaun grávida fulan hitu. Arguidu nia hahalok ne'e rezulta lezada sente moras iha kotuk laran maibé lezada la ba halo tratamentu iha óspital.

Alende ne'e iha 15 Maiu 2022 iha oras iha oras tuku 22: 00 kalan, arguidu halo tán agresaun hasoru lezada, arguidu basa makaas iha lezada nia hasan parte karuk, lezada oin nakukun monu kedas ba iha kama leten, arguidu kontinua tuku tán dala ida iha lezada nia matan parte karuk. Arguidu nia hahalok ne'e rezulta lezada sente moras, matan metan no bubu, kanek no ran sai hosi inus noibun no iha momentu ne'e lezada ba halo tratamentu iha Pradet. Antes ne'e arguidu deskonfia lezada iha relasaun ho mane seluk bainhira lezada halo hela Estágiu.

Prokuradór akuza arguidu kontra artigu 145 KP konjuga ho lei nú 7/2010 iha artigu 2,3 no 35 kona-ba lei kontra violénsia doméstika.

### **Produsaun ba provas sira**

Iha prosesu julgamentu arguidu konfesa ba faktu sira hotu no deklara ba tribunál atu separa ho lezada tanba depoisde problema sira la hela hamutuk ona.

Alende ne'e lezada mós konfirma ho akuzasaun sira no deklara katak nia simu hodi hatan atu husik malu ho arguidu tanba sira la hamutuk ona depoisde problema ne'e.

### **Alegasaun finál**

Prokurador haktuir katak arguidu konfesa ba faktu sira hotu ne'ebé akuza ba nia, nune'e husu ba tribunál atu fó kastigu ba arguidu tuir tribunál nia konfiksaun.

Enkuantu defeza haktuir katak arugidu konfesa no arrepede nia hahalok no promete sei la halo tan hahalok hanesan iha future, nune'e husu ba tribunál atu fó kastigu mais adekuandu ba arguidu.

### **Desizaun**

Depoisde avalia faktu sira hotu ne'ebé produs durante julgamentu, tribunál prova arguidu halo violénsia hasoru lezada hanesan iha akuzasaun.

Bazeia ba faktu provadu sira ne'e tribunál konklui prosesu ne'e no kondena arguidu ho

pena prizaun tinan ida.

### 3. Danu Simple

Nú. Prosesu : 0050/20.ERERM  
Kompozisaun Juis : Singulár  
Juis : Dra. Albertina Neves  
Prokuradór : Dr. Simão Seixas  
Defeza : Dr. Manuel Sarmento  
Desizaun : Pena prizaun fulan 6 suspende ba tinan 1

Iha 9 Marsu 2023, Tribunál Judisiál Primeira Instánsia Díli prezide julgamentu leitura sentensa ba kazu danu simple ne'ebé envolve arguidu/a sira Rofino, Vitoria, Orlando, Nelson, Elvis, Rodrigues no Nazario hasoru lezada no lezadu sira Francisca no Julieta, Domingas, Eduardo no Florindo, iha Munisípu Ermera.

#### Akuzasaun Prokuradór

Prokuradór akuza katak iha 02 Agostu 2020 oras lapura arguidu Nazario Gonçalves ba iha lezadu sira nia uma hodi ameasa dehan *'uma ne'e ami sei sunu tiha'* tanba hau (Arguidu Nazario Gonçalves) mehi hetan tia Francisca ho Julieta sira nia oin no sira ne'e kaer ai kulit aat ka ema buan.

Hafoin iha fali oras tuku 22:00 kalan arguidu Nelson, Vitor no Rodrigues hamutuk ba tuda lezadu sira nia uma no depois iha oras tuku 02:00 madrugada arguidu sira ba tuda fali lezada no lezadu sira nia uma, lezadu Eduardo Soares haree no koñese di'ak arguidu sira no arguidu sira hatete ba lezadu/a sira dehan ami tuda ema buan.

Lezadu Florindo Dos Santos haktuir katak iha oras refere nia haree ho matan arguidu, Elvis soares no ema barak tuda lisuk sira nia uma no iha momentu ne'ebá arguidu Elvis hakilar hodi bolu arguidu sira seluk nia naran.

Lezada Domingas haktuir katak iha lorkraik arguidu Nazario ba iha lezada nia uma oin hodi dehan katak ami nia oan moras no mehi de'it mak tia Bela no tia Francisca nia oin, nune'e mak lezada Domingas ba informa ba lezadu Eduardo katak arguidu Nazario mai ko'alia nafatin katak ita sira ne'e kaer ai kulit aat buan ahi klak.

Arguidu Nazario mós ba iha lezada Francisca nia uma, tolok aat lezada no hatete katak lezada Francisca hola ai kulit aat husi lezada Domingas ho lezada Julieta. Nune'e mós arguidu Orlando sempre ba iha lezada nia uma hodi dehan katak buan sai ona husi ne'e. Arguidu sira nia hahalok ne'e fó prejuizu material ba lezadu sira hamutuk osan rihun ida US\$1000.

Arguidu sira prátika sira nia hahalok ne'e ho forma libre, deliberada ho konsiénsia rasik hodi tau forsa hamutuk ba tuda lisuk lezadu/a nia uma hodi fó prejuizu ba lezadu/a sira. Arguidu sira hatene hela katak hahalok sira ne'e lei bandu, maibé arguidu sira hakarak halo nafatin.

Prokuradór akuza arguidu sira kontra artigu 258 nú1 konjuga ho artigu 30 nú. 2 KP.

### **Produsaun ba provas sira**

Iha prosesu julgamentu arguidu Rofino deklara katak ema tuda duni lezadu sira nia uma maibé sira la hatene sé mak tuda, arguidu mós deklara katak nia hirus malu ho nia Maun rasik Florindo tanba bainhira sira nia aman mate lezadu la mai maibé arguidu laiha problema ho lezadu Eduardo. Arguidu mós deklara katak nia hirus malu de'it ho nia maun maibé la hirus malu ho lezadu sira seluk.

Arguida Vitoria deklara katak nia hakfodak nia naran tama hotu iha akuzasaun, arguida deklara katak akontesementu ne'e kalan boot ona nune'e arguida mós toba hela iha nia uma, arguida la hatene sé mak tuda lezadu sira nia uma.

Arguidu Orlando deklara katak lezadu sira la haree ema sé mak tuda sira nia uma no sira naran duun (hatudu) de'it nune'e arguidu mós hetan hotu notifikasaun, maibé arguidu deklara katak nia la tuda lezadu sira nia uma no momentu ne'ebá arguidu iha hela uma.

Arguidu Nelson deklara katak nia temi de'it liafuan dehan manu kakuk mai lian sedu e naroman hanesan ne'e keta buat aat ka ema aat ruma mai mai karik.

Arguidu Elvis hanesan mós portavos ba arguidu nain tolu seluk deklara katak momentu tuda uma sira lahatene no sira ida idak iha sira nia uma, iha dadeer bainhira arguidu Elvis ho arguidu Nazario ba hanorin hela iha Eskola mak rona dehan lezadu Eduardo ba keixa iha Polísia tanba kalan ema tuda nia uma, bainhira arguidu fila ba uma derepente Polísia ba kaer kedas.

Aliende ne'e lezada Eduardo Soares konfirma katak arguidu sira tuur hamutuk iha arguidu Elvis nia uma hodi halo planu tuda uma no iha kalan lezada konsegue haree hetan arguidu nain tolu maka foti fatuk hodi tuda uma no lezada duni tuir arguidu sira maibé la toman nune'e arguidu sira hakilar tutuir dalan dehan ami tuda buan sira nia uma, lezada konfirma katak arguidu sira tuda uma primeiru iha oras tuku 10:00 kalan no segundu iha oras tuku 2:00 madrugada no husi hahalok arguidu sira nian ne'e resulta lezadu sira nia kalen kuak no fatuk monu tama hotu ba uma laran.

Lezadu Florindo do Santos konfirma katak nia hatene ema tuda sira nia uma hosi nia feen tanba tuda kalan primeiru lezadu laiha uma. Lezadu mós konfirma katak tuda uma iha laron segundu lezadu haree ho matan arguidu Elvis maka tuda no lezadu hakilar ba arguidu Elvis hodi dehan *nusá mak ó tuda fali uma* nune'e arguidu halai tiha.

Lezada Dominggas konfirma katak arguidu Nazario ba iha lezada nia uma hodi dehan ba lezada katak arguidu nia subriña moras no mehi hetan ferik Bela ho Sisca nia oin nune'e lezada mós ba fó hatene lezadu Eduardu.

Lezada Julieta konfirma katak nia rona de'it ema tuda uma maibé nia la hatene sé mak tuda, lezada mós konfirma katak arguidu sira halo ema hotu hatene katak ami nia família ne'e uza ai-abut, mesak ema buan de'it.

## **Alegasaun finál**

Prokuradór haktuir katak arguidu sira nega ba faktu sira hotu ne'ebé akuza ba sira hodi fó razaun katak sira la tuda lezadu sira nia uma nomós sira la hatene ema sé mak tuda malu. Maibé lezadu/a sira kontinua konfirma ho akuzasaun sira katak arguidu Elvis mós tuda uma iha kalan segundu no arguidu nain tolu seluk tuda iha kalan primeriu nune'e husu ba tribunál atu fó pena indeminizasaun ba arguidu nain haat hodi selu prejuizu ne'ebé lezadu/a sira hetan no ba arguidu seluk arguidu Rofino, Vitoria, Orlando, Nelson, Rodriques no Nazario tribunál deside tuir konfiksaun tribunál nian.

Enkuantu Defeza haktuir katak maske arguidu sira nega faktu sira maibé sira mós konfesa parsialmente ba faktu balu no rekoñese ba hahalok sira ne'e. Arguidu nain haat arguidu Rofino, Orlando, Nelson no Rodriques ne'ebé akuza katak tuda duni uma nune'e husu ba tribunál atu fó pena ne'ebé mais adekuadu ba sira no absolve arguidu/a sira seluk hanesan Vitoria no Nazario husi instánsia.

## **Desizaun**

Depoisde avalia faktu sira hotu, tribunál prova katak arguidu sira tuda duni lezadu sira nia uma, hodi estragus kalen uma nian no halo lezadu sira la seguru no moe ba maluk sira ho argudu sira nia lia fuan dehan lezadu sira buan ne'e.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu sira arrende sira nia hahalok, foin primeiravés mai hatan iha tribunál dí'ak malu ona ho lezadu sira. Nune'e tribunál konklui prosesu ne'e no kondena arguidu sira ho pena prizaun fulan neen supende ba tinan ida no arguidu sira mós sei selu indeminizasaun sivíl ba lezadu/a sira.

## **4. Krime Ofensa integridade fízika simples natureza violénsia doméstika**

Nú. Prosesu	: 0079/22 DIBCR
Kompozisaun Tribunál	: Singulár
Juis	: Dr. Argentino Nunes
Prokuradór	: Dr. Hernani Rangel
Defeza	: Dr. João Carvalho
Desizaun	: Pena multa \$45.00

Iha 15 Marsu 2023, Tribunál Judisiál Primeira Instánsia Díli prezide julgamentu leitura sentensa ba krime ofensa integridade fízika simples natureza violénsia doméstika ne'ebé envolve arguidu RAS hasoru nia feen, iha Munisípiu Díli.

## **Akuzasaun prokuradór**

Prokuradór akuza katak iha 14 Maiu 2022 iha oras tuku 5:00 madrugada iha uma Hera arguidu halo agresaun hasoru lezada, arguidu tuku dala hitu iha lezada nia matan fukun noibun kulit, tuku dala ida iha lezada nia liman kabun no tuku dala tolu iha lezada nia kabun, ain no lezada nia kidan. Arguidu ninia hahalok ne'e rezulta lezada hetan moras no kanek iha lezada nia kidan, matan, ibun no kabun. Antes ne'e arguidu sai husi uma iha kalan no fila fali iha dadeer ho kondisaun lanu todan, lezada hasee arguidu dehan

*tanba sá mak ó sai desde horikalan to'ó dadeer mak fila.* Lezada mós husu arguidu dehan *se ó ba serbisu haree fó osan mai tanba ita hahan laiha ona.* Arguidu lasimu, nerbozu no halo agresaun refere hasoru lezada. Depois akontesementu lezada ba halo tratamentu iha Pradet.

Prokuradór akuza arguidu kontra artigu 145 kona-ba krime ofensa ba integridade fízika simple konjuga ho artigu 2,3 no artigu 35 LKVD.

### **Produsaun ba provas sira**

Iha prosesu julgamentu arguidu konfesa integralmente ba faktu sira hotu ne'ebé inputa ba nia, arguidu mós deklarara katak sira di'ak malu ona no sei kontinua hela hamutuk, husu ona deskulpa no fó sala ba lezada nia família ho tua masa ida no osan US\$20.00.

Aliende ne'e lezada mós konfirma faktu sira hotu iha akuzasaun, di'ak malu ona no sei kontinua hela hamutuk, arguidu arrepende nia hahalok no promete sei la halo tán hahalok hanesan iha futuro.

### **Alegasaun finál**

Prokuradór konsidera arguidu provadu komete duni krime ne'ebé akuza ba nia, arguidu rasik konfirma nomós konfirma husi lezada nune'e husu ba tribunál atu fó pena multa ba arguidu tuir ninia forsa.

Enkuantu Defeza haktuir katak maske arguidu konfesa ba faktu hotu no konfirma mós husi lezada maibé haree ba sirkunstánsia atenuante sira hanesan arguidu arrepende nia hahalok, di'ak malu ona, husu deskulpa tuir kultura Timor nian hodi intrega osan US\$20.00 no tua masa ida nune'e husu ba tribunál atu fó pena multa ne'ebé natoon ba arguidu.

### **Desizaun**

Depoisde avalia faktu sira hotu, tribunál prova katak arguidu komete duni krime hasoru lezada, arguidu tuku dala hitu iha lezada nia matan no ibun kulit, tuku iha lezada nia liman kabun, kauza moras no kanek, arguidu tebe tan dala tolu iha lezada nia kabun, ain no kidan kauza moras no bubu.

Bazeia ba faktu provadu sira ne'e nune'e tribunál konklui prosesu ne'e no kondena arguidu ho pena multa US\$45.00, ne'ebé kada loron sei selu US\$1.00 durante loron 45. Tribunál mós fiksa pena alternativa durante loron 60 prizaun kuandu arguidu la kumpre pena multa refere.

### **5. Krime tentativa omesídiu simples**

Nú. Prosesu	: 0060/20.PNSIC
Kompozisaun Tribunál	: Koletivu
Juis	: Dr. Ana P. Fonseca, Dr. Ivan Suritay, Dr. Antonino do Carmo
Prokuradór	: Dr. Domiggos Barreto
Defeza	: Dr. Manuel Goncalves
Desizaun	: Pena prizaun tinan 8

Iha 16 Marsu 2023, Tribunál Judisiál Primeira Instánsia Díli prezide julgamentu leitura sentensa ba krime omisídiu simples ne'ebé envolve husi arguidu Julito Afonso da Silva hasoru lezadu Izac do Santos, iha Munisípiu Likisá.

### **Akuzasaun Prokuradór**

Prokuradór akuza katak iha 30 Abril 2022 iha oras tuku 18:30 lokraik lezada sai husi uma atu ba hola *supermie*, iha dalan lezada haree kareta baskolante ho nú mátrikula 58.881-TL, diresaun Likisá - Maubara mai halai ho velocidade makaas no lezadu mós hakilar tuir dehan *halai neneik* no rona ida ne'e kondutór hapara kareta derepente iha estrada ninin.

Kondutór hakiduk fali kareta no lezadu mós la'o hasoru malu ho kareta, hodi hatete ba arguidu dehan *halai kareta ho neneik*. Arguidu ne'ebé tuur iha kareta oin parte liman loos losu pistola iha nia kanotak no tiru kedas lezadu kona iha lezadu nia kotuk laran borus ba kalilin no kona iha lezadu nia liman parte karuk halo lezadu monu kedan ba rai. Depoisde rona kilat tarutu lezadu nia kolega sira hamutuk ho testemuña Honorio no Elizio halai tun ba tasi ninin no Anastasio halai fila ba uma ne'ebé ladook husi fatin akontesimentu.

Depoisde testemuña sira haree lezadu latan hela iha rai mak sira fila hikas mai hodi ajuda lezadu tula iha motorizada hodi halai ba klínika Maubara. Depoisde arguidu tiru lezadu arguidu sei tun ba haree lezadu ne'ebé latan hela iha rai no depois arguidu sae hikas kareta hodi halai ses kedan husi fatin akontesimentu.

Husi akontesimentu ne'e rézultadu lezadu hetan kanek todan iha kotuk laran parte karuk borus ba sorin no kona liman parte karuk.

Prokuradór akuza arguidu kontra artigu 23 KP kona-ba tentativa no 138 KP kona-ba omesídiu simples.

### **Produsaun ba provas sira**

Iha prosesu julgamentu arguidu hili direitu nonok.

Enkuantu lezadu liuhosi telekoferénsia deklara katak akontesemntu iha lora 30 Maiu 2020, iha oras 18:30 kalan, lezadu hetan tiru kona iha lezadu nia kotuk laran parte karuk no loos borus ba oin kona iha lezadu nia liman no lezadu hamri'ik iha parte rai hun nian, arguidu tuur iha kareta laran mak tiru. Antes akontesementu ne'e arguidu lori kareta atu soke lezadu ho ttestemuña sira ne'e maka lezadu la'o ba husu *nusá mak ita atu soke ami*, arguidu lasimu no diskute malu ho lezadu. Lezadu haree no hakfodakarguidu foti pistola tiru ba lezadunune'e lezadu, halai fila kotuk maka tiru kona iha kotuk laran. Depois arguidu tuun hosi kareta haree lezadu ran no monu iha rai, hafoin arguidu halai fila ba kareta halai ses husi fatin akontesimentu. Iha momentu ne'e testemuña Onoriu maka ajuda lori ba óspital no moentu ne'e arguidu uza sivil nune'e lezadu lahatene katak arguidu membru PNTL.

Testemuña Marcelino Soares deopitmentu katak momemtu akontesimentu nia iha kareta laran hamutuk ho arguidu, testemuña deklara katak nia rona duni pistola lian maibé nia



la haree sé mak tiru, tanba momentu rona pistola lian arguidu hakruk kedas iha kareta laran ho tauk no hanoin lakon.

Testemuña mós depoimenta katak nia rona duni lezadu ho nia kolega sira hakilar atu hapara kareta no arguidu rasik mak lori kareta hodi para kareta ba sira no bainhira para kareta, lezadu sira hakat mai hodi diskute malu ho arguidu nune'e halo arguidu nerbozu hodi tiru lezadu ne'e.

Testemuña Onorio de Asunción depoimenta katak nia iha duni fatin akontesimentu maibé ho distansia dook ointuan. Testemuña mós deklara katak nia rona duni pistola nia lian maibé nia lahtene sé mak tiru tanba kondisaun kareta taka. Testemuña konsegue mai haree lezadu monu iha baleta kuak bainhira arguidu ho kareta halai husik hela lezadu no Testemuña rasik mak tula lezadu ba iha Klínika Maubara.

### **Alegasaun finál**

Prokuradór akuza arguidu komete krime omisídiu simples, tanba ho tentativa, iha mós ezame médiku lezadu nian, lezadu hetan tiru hosi membru PNTL no hatais sivil, nune'e husu ba tribunál fó pena prizaun tuir krime ne'e'bé mak arguidu komete.

Defeza argumenta katak kazu ne'e akontese iha tempu estadu emerjénsia nia laran, arguidu nu'udar Eskoltu ba Komisáriu CNE; husu lisensa ba nia Komandante atu lori hahán ba vizita nia feen ho oan no hetan autorizaun hosi nia komandate, maske arguidu hili direitu nonok maibé, iha primeiru interrogátoriu arguidu konfesa katak lezadu ho testemuña sira maka halo uluk asaun hasoru arguidu. Testemuña sira mai nega faktu barak no duun hotu ba arguidu maka sala, lezadu mós perdua ona arguidu, defeza mós haktuir katak iha primeiru interrogatoriu testemuña Marcelino deklara katak dehan tiru ba tasi la'os ba rai hun, testemuña Marcelino nia depoimentu ne'e kontara-dis ho lezadu nia deklarasaun, nune'e husu ba tribunál atu tetu no analiza didiak antes halo desizaun.

### **Desizaun**

Depoisde avalia faktu sira hotu, tribunál prova katak arguidu komete duni krime tentativa omisídiu simples hasoru lezadu, arguidu nu'udar membru PNTL hanesan siguransa nasaun no fó protesaun ba ema hotu, arguidu mós hatene katak arma ne'ebé lori la'os atu amesa no tiru ema arbiru.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeravés mai hatan iha tribunál, nune'e tribunál konklui prosesu ne'e no kondena arguidu ho pena prizaun tinan ualu.

### **6. Krime ofensa intergrigadae fízika simples ho natureza violénsia doméstika**

Nú. Prosesu : 0080/21.ERSIK  
Kompozisaun tribunál : Singulár  
Juis : Dra. Ana Paula Fonsenca  
Prokuradór : Dr. Simão Seixas  
Defeza : Dr. Sebastião Amado de Almeida  
Desizaun : Pena Multa \$45.00

Iha 17 Marsu 2023 Tribunál Judisiál Primeira Instánsia Díli, prezide julgamentu leitura sentensa ba krime ofensa integridade fízika simples ho natureza violénsia doméstika ne'ebé envolve arguidu BS hasoru nia feen, iha Munisípiu Ermera.

### **Akuzasaun Prokuradór**

Prokuradór akuza katak iha 8 Outubru 2023 iha iha maisumenus tuku 3:00 lokraik arguidu halo agresaun hasoru lezada, basa makas dala ida iha lezada nia hasan parte karuk hodi rezulta lezada sente moras. Antes ne'e lezada fila hosi fatin tratamentu Tibar (Klibur Domin) ba vizita nia oan sira iha uma no bainhira lezada atu fila ba fatin tratamentu ne'e mak arguidu nerbosu halo agresaun refere hasoru lezada.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

### **Produsaun ba provas sira**

Iha prosesu julgamentu arguidu hili direitu nonok maske nune'e tribunál konfirma ho ninia razaun katak faktu sira ne'ebé imputa ba arguidu ne'e loos hotu.

Aliende ne'e lezada kontinua konfirma ho akuzasaun sira no deklara ba tribunál katak arguidu sempre halo agresaun hasoru lezada maske lezada halo hela tratamentu ba ninia moras. Lezada mós deklara katak arguidu sempre ba vizita lezada iha fatin tratamentu no arguidu mak haree hela sira nian oan nain haat no ida ki'ik hela iha Uma Mahon.

### **Alegasaun Finál**

Prokuradór konsidera arguidu baku duni lezada no arguidu hatene katak nia hahalok ne'e kontra lei penál, nune'e husu ba tribunál atu kondena arguidu ho pena multa tuir tribunál nia konfiksaun.

Entretantu parte defeza husu ba tribunál atu aplika pena ne'ebé kmaan ba arguidu tanba arguidu konfesa integralmente, di'ak malu ona no arepende nia hahalok.

### **Desizaun**

Depois avalia faktu sira hotu, tribunál prova katak arguidu komete krime hasoru lezada, arguidu rasik konfirma no lezada konfirma, nune'e Tribunál konklui prosesu ne'e no kondena arguidu ho pena multa \$45.00 kada loron selu ho sentavus 0,50 durante loron 90. Tribunál mós fiksa pena alternativa loron 60 prizaun bainhira arguidu la kumpre pena multa refere.

## **7. Krime ofensa intergrigadae fízika simples no arma brankas**

N. Prosesu	: 0136/18.LILIQ
Kompozisaun tribunál	: Koletivu
Juis	: Dra. Ana Paula Fonseca, Dr. João R. Dra. Julmira Maria
Prokurador	: Dr. Simão Seixas
Defeza	: Dr. João Guterres

Desizaun : Pena prizaun tinan tolu suspende ba tinan tolu fulan neen no absolve arguidu Afonso

Iha 22 Marsu 2023 Tribunál Judisiál Primeira Instáncia Dili prezide julgamentu leitura sentensa ba kazu krime ameasa no krime arma brankas ne'ebé envolve arguidu José, Mateus no Afonso hasoru lezadu Flavio, Agostinho no Ronelio, iha Munisípiu Likisa.

### **Akuzasaun Prokuradór**

Prokuradór akuza katak iha 12 Outubru 2018, iha oras tuku 3:00 lokraik lezadu Flavio hamutuk ho ninia maun hosi Dili ba Likisa atu ba uma lisan, bainhira to'o iha ne'ebá lezadu tur hein hela nia maun iha mota ninin tanba lezadu nia maun sei ba uma ko'alia ho família derepente arguidu José mosu mai kaer rama ambon no arguidu Mateus ho katana ameasa lezadu dehan *ó jagoan iha Dili la'os iha ne'e ó mangame hau kua sai tia ó nia orgaun seksuál ne'e*, no arguidu Afonso kaer fatuk hodi tuda ba lezadu maibé la kona.

Prokuradór akuza arguidu sira kontra artigu 157 kona-ba ameasa no artigu 20 no (1) Lei arma brankas.

### **Produsaun ba provas sira**

Iha prosesu julgamentu arguidu José deklara katak nia kaer duni katana maibé arguidu atu ba toos no iha dalan mota ninin mak rona hela arguidu nain rua (Mateus ho Afonso deskuti malu hela ho lezadu Flavio, arguidu mós deklara katak nia tolok duni mais laos dirije ba ema ida maibé tolok jerál ba sira hotu tanba halo problema, arguidu rekoñese mós katak nia iha sasan kroat uluk rejisténsia nian ne'ebé rai hela iha uma hodi hetan mos aprensaun husi Polísia. Arguidu Mateus deklara katak nia la kaer katana no nia tolok no ameasa duni lezadu dehan *ó jagoan iha Dili de'it ó la jagoan iha ne'e selae hau tesi kotu tiha ó nia orgaun seksuál*. Enkuantu arguidu Afonso editál.

Aliende ne'e Lezadu Flavio kontinua konfirma faktu sira iha akuzasun no deklara katak arguidu sira kaer duni arma hodi ameasa lezadu nune'e mesmu sei familia maibé lezadu tauk ho liafuan amesa ne'e nomos arguidu sira sempre uja sasan kroat nune'e lezadu decide hodi prosesu kazu ne'e no lakohi atu deziste ba krime ameasa. Lezadu Agostino no Ronelio konfirma katak arguidu sira uja duni arma hodi ameasa sira nia Maun Flavio no lezadu nain rua iha fatin akontesimentu no lezadu haree ho matan arguidu sira kaer arma hodi amaesa lezadu.

### **Alegasaun finál**

Prokuradór haktuir katak arguidu sira uja duni arma branka no lei arma brankas proibe uza arma sira ne'ebé define hanesan samurai, tudik, katana, tudik ne'ebé la inklui uza ba nesesidade uma laran ka ba halo to'os. Prokuradór husu atu arguidu labele prátika tan kualker krime iha futuru, nune'e husu ba tribunál atu analiza no kondena ba krime amesa no krime arma brankas husu tribunál atu fó kastigu suspensaun ba arguidu sira.

Entretantu parte defeza husu ba tribunál atu aplika pena suspensaun ba arguidu José tanba mesmu iha problema maibé lezada sei kontinua vizita ninia família iha Likisa no

husu mós ba tribunál atu absolve arguidu Mateus husi krime ne'ebé imputa ba nia.

**Desizaun**

Depois avalia faktu sira hotu, tribunál prova katak arguidu Jose no Mateus uza duni arma hodi amesa lezadu.

Bazeia ba faktu provadu sira ne'ebé produz iha julgamentu tribunál konklui prosesu ne'eno kondena arguidu José no Mateus hopena prizaun tinan tolu suspende ba tinan tolu fulan neen no absolve arguidu Afonso.

**Atu hetan informasaun liutan favór kontaktu:**

Ana Paula Marçal  
Diretora Ezekutiva JSMP  
Telefone: 3323883/77040735  
Diresaun e-mail: [ana@jsmp.tl](mailto:ana@jsmp.tl)  
[info@jsmp.tl](mailto:info@jsmp.tl)  
Website: <http://jsmp.tl>